

四庫全書

集部

欽定四庫全書

聖祖仁皇帝御製文集卷五目錄

勅諭

諭吏部

諭禮部

諭吏禮兵三部

諭兵部

諭吏部

諭兵部

諭刑部

諭兵部

諭禮部

諭吏兵二部

諭大將軍多羅貝勒等

諭禮部

諭內務府

諭禮工二部

諭兵部督捕衙門

諭兵部

諭吏戶兵三部

諭戶部

諭兵部

欽定四庫全書

卷五目錄

欽定四庫全書

聖祖仁皇帝御製文集卷五

勅諭

諭吏部

自古帝王統御天下必資后德之賢贊助政理昭宮闈之令範端王化之本源粵稽往代冊立中宮即加恩所生榮錫封爵所以重內治隆恩禮甚盛典也緬維仁孝皇后作配朕躬歷經十載上事

太皇太后

皇太后克誠克孝佐朕治理惟敬惟勤節儉居身寬仁  
逮下儀型允備淑德著聞詎意忽焉崩逝深悼朕懷榮  
哀之禮已行推恩之典未舉內大臣噶布喇乃仁孝皇  
后之父也勲舊世裔素篤忠貞翊衛攄夙夜之勞謀猷  
重股肱之寄茲奉

太皇太后慈諭仁孝皇后毓質名門夙昭內則芳儀永  
謝時切悲思維后德之攸彰實鍾祥之有自宜加崇秩

以合舊章朕恪遵

慈命特錫殊恩噶布喇著封為一等公給與誥命世襲  
罔替尔部即遵諭行特諭康熙十三年十二月初八日

諭禮部

古帝王撫御天下莫不以禮制為先務然釐定章程必  
文質適中方可昭垂永久前見風俗近奢恐漸流於僭  
濫故令更定條例一切服飾力崇儉樸冀反淳龐詎意  
有司奉行過當專事苛細借端紛擾以致商賈壅滯物



力匱詘小民深為未便以後著仍照康熙九年定例遵行現今一應禁約俱行停止尔部即遵諭行特諭康熙十三年十二月十三日

諭吏禮兵三部

平南王尚可喜航海歸誠勲猷懋著

太宗文皇帝嘉其勞績特錫王封及定鼎燕京復能殫竭忠忱贊襄大業

世祖章皇帝知其夙篤忠貞畀以巖疆重任鎮守粵東

海氛寧靖百姓乂安近因吳三桂耿精忠等叛逆該藩  
益勵忠純克抒偉略悉心籌畫數建膚功朕甚嘉焉事  
平優叙已有屢旨前據奏稱年老任重請以其子尚之  
孝承襲王爵已允所請今思該藩累朝勲舊功著封疆  
宜錫殊榮以酬茂績平南王尚可喜著晉封為平南親  
王即令其子尚之孝襲封尚可喜以親王品級頂帶支  
俸示朕優眷之意廣東文武事務著尚可喜照舊料理  
其親王之寶亦著暫行掌管尚之孝統兵在潮著給與

大將軍印應行封典尔等衙門即遵諭行特諭康熙十四年正月初九日

諭兵部

寧夏總兵官陳福効力嚴疆勞績素著屢次舉首逆劄克篤忠貞且其妻子家屬見在川中逆賊挾誘全無顧戀矢志不移深為可嘉著以見兼職銜陞補陝西提督給與勅印仍暫駐寧夏管總兵官事俟平涼地方平定之後即赴平涼料理提督事務陳福之弟守備陳奇妻

子家口亦陷賊中深為可憫著從優以叅將陞用尔部  
即遵諭行特諭康熙十四年三月十九日

諭吏部

內閣機密重地事務殷繁贊理需人原任大學士巴泰  
耆舊大臣雖向以年老請休精力尚健才品優長久諳  
閣務仍著以原銜入閣辦事翰林院掌院學士熊賜履  
素有才能居官清慎著陞內閣大學士應兼職銜著議  
奏尔部即遵諭行特諭康熙十四年三月三十日

諭兵部

本月初四日太監劉忠傳奉

太皇太后諭旨慈寧宮內庶妃有母九十餘歲同其兄  
薩麻地尚在察哈爾處聞之深為憫惻軍前可弗加擄  
掠等語朕欽承

諭旨仰見

太皇太后仁慈已極敢不敬副

聖懷尔部即速行文彼處如伊等陣亡則已或存一二

或全未傷殘即行收管其家產亦勿致散失交與內務府所管莊頭解送來京特諭康熙十四年五月初四日

諭刑部

邇者天氣炎亢農事堪憂雖虔誠禱祈尚稽雨澤朕念切民瘼夙夜焦勞或因刑獄淹禁中有冤枉致干

天和亦未可知茲特遣索額圖熊賜履等會同三法司將已結重案逐一詳加審鞫如有罪可矜疑者即與察明事由開列具奏務期情法允協有枉必伸以副朕欽

恤獄讞至意特諭康熙十四年五月十七日

諭兵部

秦省巖疆重地軍務方殷靖逆將軍靖逆侯張勇忠勤  
懋著謀略優長久鎮西陲奠安疆圉近復躬履行間殫  
心籌畫屢敗賊衆恢復城池志期殲滅逆渠底定秦隴  
朕甚嘉之凡用兵籌餉一切機宜必須重其事權不拘  
常格而後可以整飭軍紀齊一衆心以收蕩平之績所  
屬地方總兵官有故違節制不聽調遣者許即行指叅

副將以下有臨陣畏縮殺良冒功者聽以軍法從事其  
文官自道員以下倘有遲悞緊急軍需者許會同巡撫  
據實叅奏務令克展壯猷早奏膚功以副朕委任至意  
爾部即遵諭速行特諭康熙十四年閏五月初一日

諭禮部

帝王紹基垂統長治久安必建立元儲懋隆國本以縣  
宗社之祥慰臣民之望朕荷

天眷誕生嫡子已及二齡茲者欽承



太皇太后

皇太后慈命建儲大典宜即舉行今以嫡子為皇太子  
爾部詳察應行典禮選擇吉期具奏特諭康熙十四年  
六月初三日

諭吏兵二部

逆賊耿精忠背恩附逆煽亂閩疆荼毒生靈罪惡重大  
其兄弟親族人等律應不赦但念伊祖耿仲明於

太宗文皇帝時航海歸誠効力行間著有勞績伊父耿

繼茂自

世祖章皇帝時亦効力行間鎮守邊陲耿精忠雖行同禽獸辜負國恩其弟耿昭忠耿聚忠等道途隔遠實未同謀竟尔株連朕心不忍耿昭忠耿聚忠及親族屬下人等茲槩從寬典盡行釋放所有官職俱令照舊尔部即遵諭行特諭康熙十四年七月初四日

諭大將軍多羅貝勒等

比者仰荷

天佑及國家福祚秦州鞏昌蘭州等處漸次懾服朕甚嘉悅亦係兵丁自保寧徒步跋涉深明大義殊死効力所致貝勒等須不時存念若輩艱苦非緊要必節其勞無大過則寬其罰始可謂之軫恤行間勞瘁也貝勒等身為將軍事情經練頗多必能同寅協恭折衷而行斷不徇一己之利但相隔遼遠慮所及不得不為申布秦地實為形勢要區今張勇等將軍提督總兵及投誠兵衆雲屯一處將軍張勇之功況亦甚大恐貝勒等藐

忽視之生彼憤懣時厯朕懷貝勒等既効勤勞底定秦  
省務期克奏全功以慰朕望為此特諭康熙十四年七  
月十六日

諭禮部

往代帝王陵寢所在地方理宜守護以妥神靈朕近行  
幸湯泉道經昌平見明朝諸陵殿宇雖存戶牖損壞附  
近樹木亦被摧殘朕心深為憫惻爾部即嚴加申飭守  
陵人戶令其小心護防仍責令該地方官不時稽察勿

致仍前怠玩以副朕優禮前代之意特諭康熙十四年九月十五日

諭內務府

設官分職務得真材必分別勤惰錄用方可各勉職守有裨部院衙門政務朕見票本筆帖式溫泰為人勤慎雖才品無甚優長自

世祖章皇帝時即在票本之處効力守分寡交兼之年久其同事之人俱經超擢惟伊無人汲引耳現有郎中

缺出應將溫泰補用示朕造就之意且以風勵後之實  
心効力者尔等即遵諭行特諭康熙十四年九月二十  
九日

諭禮工二部

仁孝皇后陵寢已卜定於

孝陵附近之山理應備依典制營建但目今軍需浩繁  
民力維艱著將地宮先行修造其餘一應工程俟國用  
充足之日次第舉行著即選擇吉期竝應行事宜詳議

具奏特諭康熙十五年正月十三日

諭兵部督捕衙門

逃人事情關係旗下重大前因恐致百姓株連困苦故將條例屢行更改減定期於兵民兩益近見各該地方官奉行疎玩緝獲日少旗下民生深為未便茲應遣部院大臣會同爾衙門將新舊條例逐一詳定務俾永遠可行其應差官員職名著即開列具奏特諭康熙十五年正月十四日

諭兵部

自逆賊煽亂以來各省綠旗官員兵丁勦禦賊寇恢復  
地方戮力行間著有勞績朕心時切軫念凡以前奉旨  
事平議叙者爾部逐一察明功次即行議叙以昭朕酬  
庸鼓勵之意爾部即遵諭行特諭康熙十五年五月初  
二日

諭吏戶兵三部

邇年以來各處大兵征勦軍需浩繁一切供應皆出民



力凡領兵將軍將弁及地方督撫文武大小各官俱當以國計民生為念潔已奉公加意撙節表率屬員恪遵法紀以副朕戡亂救民之意乃有不思勦寇安民平定地方專營私射利糜費錢糧軍前所用米豆草束等項自將軍以下有自行販買囑託地方官多取價值地方官徇其情面浮冒開銷者亦有地方官販買支放多行開銷者有已備本色不行收納折價入已者有民間運到米豆草束地方官故意遲延指勒及至軍前又將解

官多方刁難恣意需索方肯收納者至於購買馬匹不開實價以少為多濫行銷算種種情弊難以枚舉皆由大小各員互相徇庇惟知貪利圖便已私大不合理應嚴加禁飭處分以清積弊以後此等事情發覺者照貪官例治罪有能舉首者從優議叙著議政王貝勒大臣會同逐一詳確定議具奏特諭康熙十五年八月初四日

諭戶部

目今正當軍需浩繁在外總督巡撫及經管錢糧各官俱宜潔已奉公殫心料理一應收支銷算詳明造冊據實開報聽部核議近見部覆各處奏銷本內或因款項不符或因數目舛錯或因造報遺漏或因冊結不到多致駁察道路往返動經歲月明係地方各官不加意清查故留疑竇希圖延挨時日以滋弊端錢糧朦混不清民力苦累益甚以後如何盡除積習錢糧不致駁察尔部定議具奏特諭康熙十五年八月十六日

## 諭兵部

自逆賊煽亂以來奸徒附和侵擾地方關隴以西疆域  
遼闊大兵一時未集人心不無動搖靖逆將軍靖逆侯  
張勇提督王進寶鎮臣孫思克一聞蘭州之變即統領  
兵馬星馳渡河勦殺賊衆攻圍蘭州臨鞏等處恢復城  
池條奏機宜舉發偽札拏獲奸細綏靖邊陲其功甚大  
及大兵攻取平涼專任靖逆侯張勇等鎮守秦鞏復殫  
心籌畫調度合宜勦禦川賊屢奏捷音紓朕西顧之憂

厥功尤為茂著伊等皆宿將重臣矢志報國同心協力  
展布謀猷兼以訓練士卒忠義素孚故能身先行陣所  
向克捷其屬下官員兵丁亦皆効力共建功績朕甚嘉  
之於軍功議叙之外應從優加恩以示朕獎勵忠貞酬  
答勲勞至意著議政王貝勒大臣會同議奏特諭康熙  
十五年八月二十日

聖祖仁皇帝御製文集卷五

欽定四庫全書

聖祖仁皇帝御製文集卷六目錄

勅諭

諭吏兵二部

諭禮部

諭吏戶兵三部

諭禮部

諭管侍衛內大臣

諭海澄公黃芳世

諭日講官起居注侍讀學士牛鈕

諭禮部

諭翰林院掌院學士喇沙里陳廷敬侍讀學士  
葉方藹侍講學士張英

諭刑部

諭新委西勒圖部落首領喇嘛墨爾根噶布褚  
諭平南親王奄達尚之信齋奏叅將羅思漢

諭遣往將軍莽吉圖軍前侍講學士顧八代

諭平南親王奄達尚之信齋奏回粵張永祥

諭禮部

諭吏禮二部

諭吏部

諭大學士明珠

諭大學士巴泰

諭廣東提督王可臣



諭大學士索額圖

諭吏部等大小各衙門

諭河南巡撫董國興

諭遣往廣西巡撫傅弘烈軍前筆帖式噶爾西

拖洛

諭大學士署禮部索額圖

諭工部尚書馬喇侍郎溫代

欽定四庫全書

聖祖仁皇帝御製文集卷六

勅諭

諭吏兵二部

撫遠大將軍都統大學士圖海器識老成才猷練達贊  
襄機務宣力累朝以文武之長才兼忠愛之至性勞績  
茂著倚毗良殷前察哈爾布爾尼背恩反叛命圖海為  
副將軍統兵征剿運籌決勝克振軍威未及一月捷功

欽定四庫全書

聖祖仁皇帝御製文集  
卷六

立奏逆賊殲滅疆圉敕寧近以平涼等處阻兵日久屢  
命剿撫罔有成效特簡圖海為大將軍總統大兵節制  
各路果爾謀略淵深調度得宜軍鋒所至一戰克捷更  
能體朕好生之心宣布恩威開誠招撫遂使平涼慶陽  
固原等處文武官員兵民人等傾心向化悔罪歸誠生  
民免於塗炭地方得以安全數日之間關隴悉皆底定  
皆由籌畫周詳布置神速剿撫並用克建膚功圖海以  
心膂大臣膺秉鉞重寄實心為國克副倚任朕心深為

嘉悅於軍功議叙外應從優加恩以示朕眷注忠勤酬  
答勲庸至意著議政王貝勒大臣會同議奏特諭康熙  
十五年八月二十日

諭禮部

帝王克謹

天戒凡有垂象皆關治理故設立專官職司占候所係  
甚重一切祥異理應詳加推測不時具奏今欽天監衙  
門止於尋常節氣尚有觀驗至今歲三月初間霜霧及

以前星辰凌犯等項應行占奏者並未奏聞皆由該監官員蒙昧疎忽有負職掌尔部即行察議具奏以後欽天監所奏占候本章內閣照例票擬批發特諭康熙十六年三月十三日

諭吏戶兵三部

自逆賊吳三桂煽亂以來各用兵地方文武官員或矢志固守勢窮莫支盡節封疆或身陷賊中堅貞不屈橫被慘害或從容就義全家殉難視死如歸此皆為國捐

軀克全忠節深為可憫其有骸骨未能歸葬妻子尚寄  
遠方孤苦無依更堪軫惻宜加恩卹以慰忠魂著各該  
督撫察明凡殉難文武大小官員骸骨妻子俱准動正  
項錢糧資送歸里以昭朕優卹忠節至意特諭康熙十  
六年三月二十七日

諭禮部

朕恭奉

聖祖母太皇太后慈諭冊立妃公遏必隆之女為皇后

尔部即選擇吉期開具儀注來奏特諭康熙十六年五月十一日

諭管侍衛內大臣

海澄公黃芳世舉家殉節被慘至極芳世坐次曾入內大臣班中已後凡有恩賞皆與內大臣一體頒賜坐次仍在舊列伊或有奏事并請安人來俱照外省漢藩等例著內班侍衛代為陳奏康熙十六年五月十六日

諭海澄公黃芳世

卿父子功烈素著復全家殉難每念及此朕心罔不傷  
悼況卿由粵東進剿忽遭廣省兵變孤身涉險而出可  
見忠貞不貳顛沛不改其守今仍襲海澄公鎮守福建  
水師提督總兵官卿愈加訓練鼓舞將士以靖海氛使  
地方秋毫無犯百姓安堵方為不負封疆重寄特諭康  
熙十六年五月十八日

諭日講官起居注侍讀學士牛鈕

尔考中進士正宜黽勉學問之時抑且年富力强自當



大有進益誦讀之功固不可廢躬行實踐尤為至要務  
時勤職業也康熙十六年五月二十日

諭禮部

朕恭奉

聖祖母太皇太后慈諭稽古帝王宮闈之制必備妃嬪  
以襄內政今冊封佟氏為貴妃李氏為安嬪王佳氏為  
敬嬪董氏為端嬪馬佳氏為榮嬪納喇氏為惠嬪郭羅  
洛氏為宜嬪黑舍里氏為僖嬪爾部即選擇吉期開列

儀注具奏特諭康熙十六年五月二十四日

諭翰林院掌院學士喇沙里陳廷敬侍讀學士葉

方藹侍講學士張英

卿等進講啓導一一悉備皆內聖外王修齊治平之道  
朕雖不敏罔不孜孜詢之每講之時必專意以聽但學  
問無窮不在徒言要惟當躬行實踐方有益於所學卿  
等仍愈加直言毋有隱諱以助朕好學進修之意康熙  
十六年五月二十八日

諭刑部

邇者農事方殷天氣亢旱朕念切民依夙夜憂惕或刑獄淹禁中有冤抑致干

天和亦未可知茲特遣巴泰明珠孔國岱項景襄會同三法司將已結重案逐一詳加審理凡有罪可矜疑者即與察明事由開列具奏務使情法允協有枉必申以副朕省刑恤民至意特諭康熙十六年六月初二日

諭新委西勒圖部落首領喇嘛墨爾根噶布褚

此廟係

太宗皇帝建立令滿習禮胡圖克突喇嘛居住嗣令諾門汗喇嘛居住嗣令尔叔西勒圖綽爾濟喇嘛居住後因徒衆揭告革退屢經更換喇嘛管理俱貪蒙古市利止以蓄養蕃滋家計殷厚為念求其能明梵教之理勉力課誦者甚少積習漸深至蒙古額木齊之輩學騎射鎗法當察哈爾叛時依附惡黨同抗大兵後叛逆盡除仍念尔叔西勒圖綽爾濟原係大喇嘛可以約束復令

管理今已物故以尔為滿習禮胡圖克突之親選委管  
理部落尔到彼即將喇嘛陋習盡行釐革務遵本業克  
守清規絕去欺妄梵教佛法咸宜闡明若踵行前弊則  
上負

太宗皇帝建剎之意下實有愧於諸名喇嘛也欽哉康  
熙十六年六月十四日

諭平南親王奄達尚之信齋奏叅將羅思漢

尔王素懷忠藎思報効國家朕已知之舉廣東全省歸

誠民免湯火之患深為可嘉據今時勢剿滅吳三桂甚為緊要大兵進取務貴神速吳逆近在湘潭其意蓋以大兵必從衡永廣東進攻故據此為備今廣西若能反正尔王即宜率兵三路進剿滿洲大兵亦令各路遄發前此吳三桂率領偽將軍十八人賊兵十萬屯聚長沙挑濠立樁僅可支持旦夕若大兵數路並進吳逆斷無如許偽將賊兵隨處備設濠樁以與大兵相抗其滅亡可翹足而待矣尔到彼即傳朕諭康熙十六年六月十

四日

諭遣往將軍莽吉圖軍前侍講學士顧八代

將軍莽吉圖於指授之處克奏成功深為可嘉宜益加  
勉勵以副朕委任之意用兵之道以神速為上從前稽  
遲以致岳州漳州廣東全省未收捷效伊所親見此後  
凡有徵調俱宜剋期迅發爾顧八代以內閣職掌前往  
檔案冊籍須逐一詳明無預外事以盡乃職康熙十六  
年六月二十七日

諭平南親王奄達尚之信齋奏回粵張永祥

近來逆賊俱偏在廣西一邊奄達宜親率將士進剿以圖功效尔張永祥既授總兵官俟有專汛應勉勵職守安戢兵民整飭地方剿除賊寇可也康熙十六年七月十三日

諭禮部

世祖章皇帝乳母朴氏保育

先皇克昭敬慎朕躬幼時殫心調護夙夜慙懃撫視周



詳情實等於顧復提攜備至時罔怠於寒暄襁抱曲體  
乎性情勤渠彌切於啼笑恭謹抒匪懈之忱淑惠盡慈  
愛之義每懷疇昔時厯於衷封典宜加用彰隆眷今封  
為奉聖夫人頂帽服色照公夫人品級爾部即遵諭行特諭  
康熙十六年七月二十五日

諭吏禮二部

自古帝王統御寰區首在敦崇孝治既已追尊母后揚  
圻慈徽尤必推恩外戚優加封爵展孝思於靡盡昭發

祥之有源甚盛典也緬惟

慈和皇太后奉事

太皇太后克盡誠孝佐助

皇考夙著敬勤誕育朕躬纘承鴻業每懷顧復深慈不  
勝本源永慕恩推所自允符彞章原任都統精奇尼哈  
番佟圖賴

慈和皇太后之父也勲舊世裔宣力累朝厚德鍾祥篤  
生

聖母念劬勞之罔報宜恩禮之隆施特晉崇階以昭典制  
佟圖賴著將精奇尼哈番加封為一等公妻焦氏封為公夫人  
給與誥命世襲罔替  
爾部即遵諭行  
特諭康熙十六年七月二十五日

諭吏部

內閣機密重地事務殷繁需人贊理尚書勒德洪明珠著補授內閣大學士應兼職銜著議奏  
爾部即遵諭行  
特諭康熙十六年七月二十九日

諭大學士明珠

卿才能素著久任股肱特簡絲綸重地贊理機務因卿  
夙稽典史曉鬯古今責難陳善之理文獻通考等書皆  
致君澤民至道所係特以賜卿退食之暇可時觀閱以  
副朕虛懷求治之意特諭康熙十六年八月初一日

諭大學士巴泰

卿以年邁請休情詞懇切准以原官致仕以遂其志念  
卿効力有年清端勤慎今將所御衣冠帶靴特賜與卿

用旌老臣以昭朕始終眷戀至意特諭康熙十六年八月十四日

諭廣東提督王可臣

卿久任巖疆聲名素著故特簡禁近茲因廣東要地授為提督爾至地方撫戢兵民剿滅賊寇奠安疆圉以副朕委任之意康熙十六年八月十五日

諭大學士索額圖

卿首膺機密之重素著輔弼之猷讜言屢進每得其效

竭力無餘恒見其勞誠為股肱心膂兼之蘊蓄淵深博聞廣見想翰墨餘事博物品類必了然心目朕於萬幾之暇貯有試筆墨字五幅珍玩玉器二具特賜與卿瞻觀之時即知隆眷之意特諭康熙十六年八月十八日

諭吏部等大小各衙門

向來各衙門事件關係重大者雖有定限赴科道稽察但事有易結者即宜速結必俟限滿方行題覆多致壅滯更有各項呈狀不係註銷者任意耽延借端拘提人

犯數月不為審結無辜牽累殊堪憫惻以後題覆本章俱著速行料理不必盡拘定限至於審理事件亦速為完結著照註銷欽件例定限每月造冊赴都察院科道稽察具奏尔等各宜力圖振作體恤民隱以副朕孜孜求治之意特諭康熙十六年八月二十三日

諭河南巡撫董國興

尔前任巡撫雖無善狀未有過端因病求罷遂爾解任今復簡尔巡撫河南宜以愛民為要徵收賦稅慎勿煩

擾百姓委曲勸輸以資兵餉務期竭盡心力以副特用之意康熙十六年九月初二日

諭遣往廣西巡撫傅宏烈軍前筆帖式噶爾西拖洛

傅宏烈自歸正以來盡力報効綏定地方朕深嘉焉傳諭知之爾等亦宜殫心勉勵凡伊所司檔案之外他事無得干預康熙十六年九月初八日


諭大學士署禮部索額圖



所賜外藩蒙古廩食數原充足所飼馬匹亦皆肥壯粟肉草豆未曾核減近聞供給不足馬匹瘦羸此皆司事并看餵馬匹人員作弊侵剋所致此後著禮部堂官親身嚴察康熙十六年九月初九日

諭工部尚書馬喇侍郎溫代

尔等俱係特簡工部近見工部事務弊端甚多各宜勉盡乃職釐剔積弊以副朕委任之意康熙十六年十一月初二日



聖祖仁皇帝御製文集卷六

欽定四庫全書

集部

聖祖仁皇帝御製文集卷

七至  
九

臣 永瑤 恭 校

侍讀臣孫球覆勘

覆校官中書臣施光輅

校對官中書臣王鍾泰

謄錄舉人臣沈一鶚

欽定四庫全書

聖祖仁皇帝御製文集卷七目錄

勅諭

諭巴林長公主

諭傅弘烈賚奏道臣劉曉

諭內閣傳諭平南親王奄達尚之信賚奏人

諭吏部

諭將軍穆占

諭戶部

諭禮部

諭吏戶兵三部

諭撫蠻滅寇將軍廣西巡撫傅弘烈

諭吏兵二部

諭掌院學士陳廷敬侍講學士張英侍讀王士

禎中書舍人高士奇

諭對秦吳默納等

諭大學士撫遠大將軍圖海

諭吏部等衙門

諭兵部

諭中書舍人高士奇

諭刑部

諭禮部

諭吏部等衙門

諭將軍穆占

欽定四庫全書

月  
本  
不  
三  
行  
新  
刊  
二  
十  
卷  
七  
目  
錄



欽定四庫全書

聖祖仁皇帝御製文集卷七

勅諭

諭巴林長公主

淑慧長公主體中安否公主孝敬性成諸事無不周詳  
即至微之物皆極精美每年各種油凝乳餅并羊腊等  
件進奉

太皇太后及朕者尤極誠恪故

太皇太后聖祖母時增七箸朕亦為之加餐念姑常從  
遠處賚送恩特製衣相寄未有式樣因將薩哈爾察貂  
皮外褂貂獬袍并鈕扣又製帽黑狐皮一張文綺內緞  
表裏各十端付之來使若不以輕微可製衣服之天氣  
嚴寒遣人未便故詳布朕意附札以往康熙十六年十  
一月二十五日

諭傅宏烈賚奏道臣劉曉

將軍傅宏烈為國忘家黽勉効力所奏諸事俱係當今

急務區畫周詳朕甚嘉納爾歸傳與傳宏烈此後益當  
整頓師旅速滅賊寇以副朕出民湯火至意康熙十七  
年正月十一日

諭內閣傳諭平南親王奄達尚之信賞奏人

昔尔老王在時果品細物無不誠潔二年以來粵東事  
變道路阻塞信使不通念及尔老王素日忠貞不貳為  
國忘家罔不憫傷今王能承先志恢復粵東使人遠來  
請安兼進橙子可嘉但用兵之秋非比無事之時况見

此物不勝思念尔老王王當安戢地方恢復粵西湖南以全尔老王未盡之意朕心甚為期望此等細務勞人費事勿復為念已後暫止康熙十七年正月十二日

諭吏部

自古一代之興必有博學鴻儒振起文運闡發經史潤色詞章以備顧問著作之選朕萬幾時暇遊心文翰思得博洽之士用資典學我朝定鼎以來崇儒重道培養人材四海之廣豈無奇才碩彥學問淵通文藻瑰麗可

以追踪前詒者凡有學行兼優文詞卓越之人不論已  
未出仕著在京三品以上及科道官員在外督撫布按  
各舉所知朕將親試錄用其餘內外各官果有真知灼  
見在內開送吏部在外開報於該督撫代為題薦務令  
虛公延訪期得真才以副朕求賢右文之意尔部即通  
行傳諭遵行特諭康熙十七年正月二十三日

諭將軍穆占

尔所密奏事宜朕已悉知前議政王大臣所議因無接

濟之兵令尔前進今賊將韓大任窮蹙來歸諸處俱已  
尅復江西全省將士皆有餘暇故著簡親王與尔會同  
酌議移文想尚未至尔是以先為陳奏耳在廷所議乃  
合諸路情形統籌全局覽尔將軍等所奏各執已見者  
甚衆此皆無濟於事嗣後須當同心勉力無負委任將  
軍身體如何彼處諸將士佳否原奏發回特諭康熙十  
七年二月初四日

諭戶部

錢糧關係國家大計年來各處兵馬需用糧餉最為浩繁在外總督巡撫及經管錢糧各官俱宜潔已奉公殫心料理一應支放開銷務須嚴加稽核詳慎節省方於軍國有裨近見各處奏銷或製備物料並不先行題明藉口軍機緊急濫請銷算或不行察核重複支給又不為扣抵或朦混重領希圖利己致滋糜費以及侵欺浮冒種種弊端難以枚舉以後應作何嚴行禁飭處分尔部會同吏兵工三部詳議定例具奏特諭康熙十七年

二月初九日

諭禮部

皇后鈕祜盧氏端懿夙著作配朕躬奉事

太皇太后

皇太后恪恭婉順殫竭孝忱正位宮闈節儉寬仁克襄  
內治芳型伊始淑德彌彰茲於康熙十七年二月二十  
六日崩逝追念壺儀良深痛悼宜有稱謚以垂永久著  
內閣翰林院會同擬奏其應行典禮爾部詳察速議具



奏特諭康熙十七年三月初二日

諭吏戶兵三部

朕統御寰區孜孜圖治期於朝野安恬民生樂業共享  
昇平乃副朕宵旰勵精之願不意逆賊吳三桂背恩煽  
亂各處用兵禁旅征剿供應浩繁念及百姓困苦不忍  
加派科斂因允諸臣節次條奏如裁減驛站官俸工食  
及存留各項錢糧改折漕白二糧顏料各物增添鹽課  
鹽丁房田稅契牙行雜稅官戶田地錢糧奏銷浮冒隱

漏地畝嚴行定例處分用過軍需未經報部不准銷算  
以上新定各例不無過嚴但為籌畫軍需早減逆賊以  
安百姓之故事平之日自有裁酌各省督撫提鎮大小  
文武等官俱宜上體朕意下念民生潔已奉公愛惜物  
力務期早奏蕩平與民休息以稱朕乂安海宇至意尔  
三部即通行傳諭遵行特諭康熙十七年三月十二日  
諭撫蠻滅寇將軍廣西巡撫傅弘烈

覽卿所奏安人心固內地勦賊之策一一悉備疏內頒

旨及部議不甚如意又一時更換撫院藩司心甚疑畏  
暫允其請俟廣西平定再為更易未為遲也等語以後  
朕自有裁酌疏內河南綠旗兵三千北邊綠旗馬兵一  
千福建藤牌手一千或江西贛州鎮標挑兵一千著前  
營遊擊管天祥帶領迅赴臣營臣得此添兵五千便可  
獨力前征等語但調北邊綠旗官兵途路遙遠不能無  
慮近省綠旗官兵但有可調務允所奏疏內用其弟帶  
領官兵來守梧州等語此人離粵日久難以復回又恐

其兄有疑心也密陳之疏留中其廣東布政司一事高  
州官兵一事滿洲大兵一事已有密旨著部議卿爾  
忘家勲猷夙著恢復潯梧斬賊巨魁屢屢有功因賊負  
固踞險一時不能即效卿愈加勤力勦撫粵西掃蕩逆  
氛以副朕倚任至意特諭康熙十七年三月十六日

諭吏兵二部

向以閩省海疆要地雖經恢復海逆未平民生凋敝撫  
綏防禦全藉文武大吏殫心料理方於兵民有裨今總

督郎廷相提督段應舉自簡任以來為時已久山谷之  
伏莽未靖閭閻之困苦未蘇吏治未見澄清營伍漫無  
整頓寇警頻聞地方騷擾更有甚者海賊侵犯內地事  
前不能防禦事後不能堵剿皆由該提督庸劣無才職  
業不修殊負簡任之意豈可仍令在任貽誤封疆著大  
將軍康親王叅贊大臣靖南王及鎮平將軍會同嚴加  
確議密行具奏尔二部即遵諭行特諭康熙十七年三  
月二十四日

諭掌院學士陳廷敬侍講學士張英侍讀王士禎  
中書舍人高士奇

朕召卿等編輯適五臺山貢至天花鮮馨罕有可稱佳  
味特賜卿等使知名山風土也康熙十七年閏三月二  
十一日

諭對秦吳默納等

尔等聞有皇后事欲以告祭長白山事畢將所委諸務  
暫停來京固是但來已無及且烏喇等處未可頻行遣

使可將大小事宜逐一料理完結從容歸來朕於二三  
月間體稍違和今已安善尔等佳否康熙十七年閏三  
月二十五日

諭大學士撫遠大將軍圖海

卿向在機密重任澡德浴身志節高潔奉命西征早清  
巨寇宣布德意兵過之地秋毫無犯舊德老成可謂社  
稷之臣前者拉都戶來知卿平安朕心良足慰也今因  
拉都戶復回汎地故示朕意特諭康熙十七年四月初

五日

諭吏部等衙門

國家設法定例原期章程盡善垂之久遠上裨軍國下益民生必藉內外臣工精白乃心恪恭詳慎實心奉行方克永遵而無弊近見各處章奏凡於現行之例或借端營私巧為掩飾或推諉卸過冀免處分或徇庇情面曲為彌縫凡行一事每滋弊端以致良法美意澤未下究而累已及民揆諸立法初意殊為未符此等情弊科



道官雖有風聞因無確據難於指叅朕雖洞悉緣由期  
其自行改悔不加深求遂爾因循以為僥倖之路以後  
在內部院等衙門在外督撫各官俱著滌慮洗心痛改  
積習於有益國家民生事務籌畫擔當不避嫌怨務期  
法行無弊恩被閭閻以副朕立法定制愛養斯民至意  
如視為故事仍蹈前轍事經發覺定行嚴加處分決不  
饒恕著通行申飭遵行特諭康熙十七年四月二十三  
日

諭兵部

提督九門步軍統領費揚古自任事以來夙夜勤勞殫心料理緝獲盜賊搜捕奸宄使里巷寧謐輦轂肅清向來効力有年今尤克稱厥職應行議叙以示鼓勵作何加恩著議奏特諭康熙十七年四月二十七日

諭中書舍人高士奇

尔在內辦事有年凡密諭及朕所覽講章詩文等件纂輯書寫甚多實為可嘉特賜表裏十足銀百兩以旌尔

之勤勞特諭康熙十七年五月初十日

諭刑部

刑獄重地人命攸關天氣炎熱亟宜清理雖熱審定例  
每歲舉行但已結大案見在監禁者其中各犯或有無  
知而罹法網小過而陷重辟株連無辜淹禁日久朕心  
每思及此深為惻然茲特遣索額圖勒德洪杜立德屯  
泰等會同三法司逐一詳加審理凡有罪可矜疑者即  
與察明事由開列具奏務使情法允協有枉必申以副

朕欽恤刑獄至意特諭康熙十七年五月十三日

諭禮部

朕惟天人感召理有固然人事失於下則天變應於上  
捷如影響豈曰罔稽今時值盛夏天氣亢暘雨澤維艱  
炎暑特甚禾苗枯槁農事堪憂朕用是夙夜靡寧力圖  
修省躬親齋戒虔禱甘霖務期精誠上達感格

天心尔部即察例擇期具儀來奏特諭康熙十七年六  
月十三日

諭吏部等衙門

時當盛夏亢暘不雨酷暑經旬蘊隆未解又於是月十二日有青氣竟天之異因朕涼德布政不均罔克昭事上帝協叙陰陽

上天垂戒良有其由朕夙夜徬徨循省思咎茲已躬親齋戒虔行祈禱因念國家立綱陳紀分職宣猷政務繁多易滋闕失或用人未當賢否混淆以致庶績未熙事多叢脞內而部院總天下之樞機或條例有未盡善外

而督撫繫生民之休戚或吏治有未澄清以致朝廷德意不能下究軍民疾苦無由上聞名茲災青謹告良殷凡今有應行應革事宜關係政治得失者著在京三品以上堂上官及言路諸臣各抒所見切實直陳朕將採擇施行用以上迓

天和綏乂蒸庶勿得浮泛塞責負朕求言圖治至意特諭康熙十七年六月十三日

諭將軍穆占

尔等近來行兵致有大臣陣亡聞之不勝傷悼兼之兩  
將軍彼此推諉以非己汎為辭恐於事機有誤深為憂  
之尔等爭執雖屬細事但尔前此欲將簡親王兵與尔  
相繼前進止畱將軍和善額附希福鎮守陳請前來朕  
未之允盖以江西地方所關甚鉅且無接續之兵此將  
軍等所悉知務令江西不生事變兩將軍商確萬全保  
其無虞屢有諭旨何至尚厯朕懷今簡親王畱鎮在彼  
尚有此事尔復藉口非已汎地倘如所請遣簡親王繼

爾進兵今此賊衆又將何兵禦之滿兵之勢貴聚聚則處處攻戰始克有利若無用空城使滿兵分駐以寡力而遇賊輕戰有志氣者盡歿行陣無賴之徒俱行敗北如此則實為可惜滿兵關係極為重大利戰則戰利守則守宜合全力以破賊衆若將所復賊棄之空城固執分守似乎不可今福建廣東情形亦不甚妥爾等益當同心協意保固地方特此密諭康熙十七年七月初二日





聖祖仁皇帝御製文集卷七

欽定四庫全書

聖祖仁皇帝御製文集卷八目錄

勅諭

諭大將軍康親王傑淑

諭安親王岳樂

因岳州將軍等失機特諭議政諸臣

諭禮部

諭吏部

諭盛京將軍安褚護

諭戶部

諭內務府

諭吏部

諭兵部

諭禮部

諭禮部

諭吏部

諭刑部

諭禮部

諭兵部

諭兵部

諭戶部

諭吏部等衙門

諭戶工二部



欽定四庫全書

聖祖仁皇帝御製文集卷八

勅諭

諭大將軍康親王傑淑

近聞海澄被陷大臣提督俱各自盡殊為憫惻前以初至兵力即當削平山海諸寇因尔等輕視賊衆止知休養士卒有失遠謀以至於此今勢不可緩緩則賊可据守地方積蓄糧草固其濠壘所關非細或有匪類乘此

蠢動亦未可定王其悉心籌度謀出萬全速滅賊氛慰朕懸切行間諸事王應統為陳奏特此密諭康熙十七年七月初二日

諭安親王岳樂

王肺腑至親久駐炎疆因長沙地勢卑濕朕每多懸念來使抵京奏王平安朕心良足慰也今牙圖復回長沙故示朕意特諭康熙十七年七月二十六日

因岳州將軍等失機特諭議政諸臣



據今時勢最緊要者全在岳州此不可不速取也近雖  
少有失利然民為賊所迫尚有嚮往朝廷之心朕欲親  
率滿洲綠旗大兵聲明肆討儻失此機會則滿兵不服  
水土致挫鋒銳愈難收拾凡在軍前將軍皆謂破賊無  
期委靡如此即有志者恐亦掣肘不能行矣會議者國  
家謀猷所賴卿等有速滅巨憝救民水火之策亦宜預  
為商確著詳議以聞康熙十七年八月十六日

諭禮部

元良關係國本慶喜懋膺

天眷今皇太子出痘荷

天地

祖宗

社稷之祐已經痊愈朕心欣悅應遣官致祭

園丘

方澤

太廟

社稷行告謝禮尔部作速擇吉來奏特諭康熙十七年十二月初九日

諭吏部

皇太子出痘痊愈朕心欣悅醫官甄國鼎候選知縣傅為格侍奉調理小心勤慎宜行議叙以示加恩尔部議奏特諭康熙十七年十二月二十五日

諭盛京將軍安褚護

今據鎮守寧古塔烏喇將軍巴海寄字與侍衛瓢子對

秦云副都統布克韜還自盛京向衆宣言已經遷移盛京之人出兵不行差遣凡有事故俱照寧古塔例寬至五年始行結案遷移之人皆加級賞賚其時適值將布克韜補授副都統鄂泰員缺移文到彼宣旨畢布克韜復向達布都杜牛諾海祁木訥等言伊得補副都統之故尔等亦應遷移因此達布都杜牛諾海祁木訥等俱各率本佐領於正月初六初十日與從前原欲遷移佐領一同遷移惟副都統查努喀瓦柳杜布達喀阿巴泰

巴牛堪屠木柱賈齊哈七佐領並納達納半佐領仍欲  
畱彼其先不願遷者今既欣然欲遷望兩侍衛轉奏等  
語觀此則達布都杜牛諾海祁木訥等所言遷移是實  
若將伊等於盛京安插則地方窄狹所分田土遙遠必  
致糜費錢糧爾來京師曾面奏云欲於山海關以外諸  
城分設駐防協領副都統將舊官兵歸併一處駐札似  
為有益今詳繹爾言甚當應速行之其地方遠近田土  
多寡會同彼處大臣詳議具奏特諭康熙十八年正月

初五日

諭戶部

江西舊欠錢糧屢經該省總督巡撫及科道等官奏請蠲免朕已洞悉但當逆賊煽亂之時各省地方與賊接壤者被其侵犯迫而從逆情非得已故於平定之後其舊欠錢糧應蠲免者悉行蠲免江西於賊未到之先地方奸徒輒行倡亂廣信南康饒州奉新寧州宜黃安仁永新永豐彭澤湖口瀘溪玉山鉛山等處所在背叛忠

義全無紳衿兵民人等或附和嘯聚抗拒官軍或運送糧米助張賊勢或布散偽劄惑誘良民或窩藏奸細潛通消息輕負國恩相率從逆以致寇氛益熾兵力多分遲延平定之期勞師費餉揆厥所由良可痛恨即今田廬蕩析家室仳離皆其自作之孽逋賦未蠲職此之故但思逆寇漸經殲除地方凋敝舊欠追比民困愈深朕心殊為不忍其十六年以前舊欠錢糧著盡行蠲免尔部即行該督撫通行曉示務使小民均霑實惠以昭朕

愛養百姓至意特諭康熙十八年二月初四日

諭內務府

近聞從前所賜包衣佐領及渾託河人等葬地今已無  
餘此等窮寒之人在日辛勤供役沒無葬身之處甚為  
可憫著於戶部查交爾衙門田地內酌量撥給特諭康  
熙十八年二月初九日

諭吏部

朕以萬幾時暇留心經史思得博學鴻儒備顧問著作



之選故特頒諭旨令內外諸臣各舉所知膺薦人員已  
經陸續到部欲行考試因天寒晷短恐其難於屬文弗  
獲展厥蘊抱今天氣已漸融和應定期考試所有合行  
事宜尔部會同翰林院詳議具奏特諭康熙十八年二  
月十七日

諭兵部

我國家開創大業軍法最為嚴明凡擊斬賊衆攻取城  
池必據實奏報復行確核功罪昭著故能信賞必罰鼓

勵我行並無虛偽冒功之弊今自用兵以來每覽各處奏捷章疏其中固有實在建功者亦有虛詞妄報者如擊敗賊兵動稱斬殺甚多或云數千或云萬餘或云不計其數甚至賊棄空城或云如何攻取如何恢復妄行謊報微功小寇任意鋪張議叙之時希冀濫邀陞賞殊非人臣事上勿欺實心為國之誼以後各處領兵大將軍將軍督撫提鎮等務須洗心滌慮勿蹈前轍凡於報捷必確核功績據實上聞如因仍陋習濫軍功或被

傍人舉首或別經發覺定以軍法從重治罪決不饒恕  
尔部即通加嚴飭併曉諭官兵一體遵行特諭康熙十

八年三月二十一日

諭禮部

自古帝王敦重倫常篤念勲舊必有褒嘉之典以示推  
恩孝昭皇后德著椒宮母儀天下懿範如在每切追思  
其父公遇必隆簪纓世裔宣力累朝忠殫謀猷功存弼  
亮况篤生賢淑佐理宮闈宜加表揚垂諸永久已勅所

司特為建立祠堂其妻縣主夙懋溫恭克昭家訓宜並  
祔享朕親製碑文勒之貞珉告成之日應賜諭祭尔部  
詳察典例具奏特諭康熙十八年三月二十四日

諭禮部

時已入夏天氣亢暘農務方興雨澤未降恐麥禾不能  
及時長養朕心深為惓切著尔部堂上官一員同順天  
府官員竭誠祈禱特諭康熙十八年三月二十六日

諭吏部

薦舉到文學人員已經親試其取中一等彭孫適倪燦  
張烈汪霽喬萊王頊齡李因篤秦松齡周清源陳維崧  
徐嘉炎陸萊馮勛錢中諧汪楫袁佑朱彝尊湯斌汪琬  
邱象隨二等李來泰潘耒沈珩施潤章米漢雯黃與堅  
李鎰徐鉉沈筠周慶曾尤侗范必英崔如岳張鴻烈方  
象瑛李澄中吳元龍龐塏毛奇齡金甫吳任臣陳鴻績  
曹宜溥毛升芳曹禾黎騫高詠龍燮邵吳遠嚴繩孫俱  
著纂修明史其現任候補及已仕未仕各員作何分別

授以職銜其餘現任者仍歸原任候補者仍令候補未仕者俱著回籍內有年老者作何量給職銜以示恩榮尔部一併詳議具奏告病者不必補試特諭康熙十八年三月二十九日

諭刑部

今已入夏亢陽不雨耕種愆期民生何賴或內外問刑衙門有無知而罹法網小過而陷重辟株連無辜淹禁日久刑獄重地人命攸關審擬未當有干

天和朕心每思及此深用警惕茲特遣索額明珠杜  
立德等會同三法司將已結大案見在監禁者逐一詳  
加審理務期明允無使冤滯其在外直省監候重犯應  
選三法司滿漢賢能司官前往察審凡罪可矜疑者會  
同該撫臬司詳開情由具奏俾無枉無縱以祈

天休副朕慎刑愛民至意其應遣司官開列職名具奏  
特諭康熙十八年四月初四日

諭禮部

民資粒食以生今時值夏令雨澤未降久旱傷麥秋種未下農事堪憂皆由朕躬涼德政治未協大小臣工不能廉己愛民勤修職業致干

天和朕用是夙夜靡寧深切警惕實圖修省諸臣亦宜循省過愆恪共乃職期於共襄治理感召休和茲當虔誠齋戒躬詣

天壇親行祈禱為民請命尔部即擇期具儀來奏特諭  
康熙十八年四月初十日



諭兵部

湖南廣西等處已經底定滇黔指日蕩平凡在京在外  
大小文武官員內有家口陷於賊中者有隻身投誠家  
口仍在彼處者有以前抗賊被害而家口尚有畱遺者  
大兵到日著逐一清察務加保全俾令得所聽其親眷  
完聚尔部即通行傳諭各路大將軍將軍督撫提鎮等  
遵行特諭康熙十八年四月二十二日

諭兵部

逆賊吳三桂煽亂以來各處大小文武官員克堅臣節  
不負朝廷不辱身名者既已加恩旌異以勵忠貞其或  
勢窮力極迫而從賊者朕久已洞悉苟悔罪來歸概行  
寬宥惟祖澤清父子受國家恩養甚厚前澤清叛時意  
其必被賊迫脅不得已從逆及既降復叛則甘心附賊  
可知情罪重大國法難容不許招撫亦不許准其投誠  
尔部即密行傳諭各路大將軍督撫提鎮等遵行康熙  
十八年四月二十二日

諭戶部

民生以食為天必蓋藏素裕而後水旱無虞自古耕九  
餘三重農貴粟所以藏富於民經久不匱洵國家之要  
務也比以連年豐稔粒米充盈小民不知蓄積恣其狼  
戾故去年山東河南一逢歲歉即以饑饉流移見告雖  
議蠲議賑加意撫綏而被災之民生計難遂良由地方  
有司各官平日不以民食為重未行申明勸諭之故近  
據四方奏報雨澤霑足可望有年恐豐熟之後百姓仍

前不加搏節妄行耗費著各該地方大吏督率有司曉諭小民務令力田節用多積米糧庶俾俯仰有資凶荒可備以副朕愛養斯民至意尔部即遵諭行特諭康熙十八年六月初八日

諭吏部等衙門

自古帝王撫御萬方兢兢業業勤求治理必期陰陽順序和氣凝庥或遇災異示儆務省愆思過實修人事挽回

天心茲者本月二十八日巳時地震之變謹告非常反  
覆思維深切悚惕蓋由朕躬不德敷治未均用人行政  
多未允符內外臣工不能精白乃心恪盡職掌或罔上  
行私或貪縱無忌或因循推諉或恣肆虐民是非顛倒  
措置乖方大臣不法小臣不廉上干

天和召斯災眚若不洗心滌慮痛除積習無以昭感格  
而致嘉祥朕茲力勤政務實圖修省目今應行應革事  
宜著部院三品以上官及科道在外各該督撫明白條

奏直言無隱其在京三品以上堂官并督撫提鎮俱著  
據實自陳毋得浮泛塞責爾部即遵行仍通行曉諭內  
外軍民人等咸使聞知特諭康熙十八年七月二十八  
日

諭戶工二部

朕御極以來孜孜求治期於上合

天心下安黎庶夙夜兢惕不敢怠荒乃於本月二十八  
日已時地忽大震變出非常皆因朕躬不德政治未協

大小臣工弗能恪共職業以致陰陽不和災異示儆深  
思愆咎悚息靡寧茲當力圖修省以迓

天庥念京城內外軍民房屋多有傾倒無力修葺恐致  
失業壓倒人口不能棺殮良可憫惻作何加恩軫恤著  
速議具奏仍通行曉諭咸使聞知特諭康熙十八年七  
月二十八日

聖祖仁皇帝御製文集卷八